


江南通志

自首卷二之一  
至三之一

內閣文庫		
函	冊	號
二四一	六九二	三九六九
架	冊	號
漢書類		

內閣文庫		
函	冊	號
二九一	六九二	三九六九
架	冊	號
漢書類		
(六五九)		

內閣文庫		
番號	漢	3969
冊數	692 ( 56 )	
函號	291	97



江南通志

首卷 二之一

淺草文庫

聖祖仁皇帝

詔諭

順治十八年

天承運

皇帝詔曰惟我國家受

天眷命

祖功

宗德肇造丕基我

皇考大行皇帝盛德至仁英資大度繼承曆數統一寰區恩澤

洽於多方政教臻於上理方期邦國永底雍熙不幸奄棄臣民遽升

龍馭顧茲大寶屬以藐躬朕煢煢在疚本不忍聞而諸王貝勒大臣文武官員人等僉謂神器既已攸歸天位不宜久曠堅請再三朕是以俯徇與志勉抑哀衷於是月初九日禱告

天地

宗廟

社稷卽皇帝位仰惟

上天眷祐之篤

祖宗付託之隆涼德冲齡膺茲重寄敬圖觀光揚烈用紹無疆之休其以明年爲康熙元年與天下更始式衍舊恩率弘新

化所有合行事宜開列於後

康熙十七年正月二十三日

諭吏部自古一代之興必有博學鴻儒振起文運闡發經史潤色詞章以備顧問著作之選朕萬幾時暇遊心文翰思得博洽之士用資典學我朝定鼎以來崇儒重道培養人材四海之廣豈無奇材碩彥學問淵通文藻瑰麗可以追踪前喆者凡有學行兼優文詞卓越之人不論已未出仕著在京三品以上及科道官員在外督撫布按各舉所知朕將親試錄用其餘內外各官果有真知灼見在內開送吏部在外開報於該督撫代爲題薦務令虛公延訪期得真才以副朕求賢右文之意爾部卽通行傳諭遵行特諭

康熙二十三年十月二十五日

諭大學士明珠王熙明太祖一代開創令主功德並隆朕巡省方域將及江寧鍾山之麓陵寢斯在朕優遇前代况於其君實賢可祀之如禮內閣禮部太常寺會議具奏

康熙二十三年十一月初二日

諭大學士明珠總督王新命明太祖陵寢歷經年世幸本朝加意護守鬱然無恙朕躬詣奠祭典數優崇今車駕將旋圖善其後爾等可傳諭守陵太監及陵戶朝夕敬慎巡視罔輟灑掃維勤毋令附近民人旗丁恣行蹂踐其在陵守視人等特加賞賚以示恩恤彰勸厲焉特諭

康熙二十三年十一月初三日

諭江南江西總督江蘇巡撫明太祖天資英武敷政仁明芟刈羣雄混一區宇肇造基業功德並隆其陵寢在鍾山之麓係江寧所屬地方向已有旨令有司各官春秋致祭嚴禁樵採并設有守陵人戶朝夕巡視但爲日已久不無廢弛今朕省方江寧親詣拜奠見墻垣傾圮林木凋殘皆係無知民人不遵約束恣肆作踐往來行走殊違法紀嗣後爾等督令地方各官不時巡察務俾守陵人役用心防護勿致附近旗丁居民仍前踐蹋所有春秋二祭亦必虔潔舉行以副朕崇重古帝王陵寢至意特諭

康熙二十三年十一月初四日

諭吏部尚書伊桑阿

恭紀河渠志

康熙二十三年十一月初四日

諭江南大小諸臣朕向聞江南財賦之地今觀市鎮通衢似覺充盈其鄉邨之饒人情之樸不及北方皆因粉飾奢華所致爾等身為大小有司當潔己愛民奉公守法激濁揚清體恤民隱以副朕望老安少懷之至意

康熙二十四年二月初四日

諭按察使于成龍

恭紀河渠志

康熙二十四年十一月初四日

諭戶部朕惟自古帝王統一寰區懋先德化必子惠黎元勤求民瘼俾幹止寧成家給人足而後世躋雍熙治登上理朕御極以來宵旰圖治未敢即安念切民依思培邦本雖編氓漸

得遂生而閭閻正資惠養欲使羣生樂利比戶豐盈惟頻行減賦蠲租庶萬姓得沾實惠前此用兵以來河南湖北兩省民人轉輸供億勞費繁多特沛仁恩以昭軫恤所有康熙二十五年應徵地丁各項錢糧著與蠲免一半其康熙二十四年未完地丁錢糧亦著盡與豁除又直隸獻縣河間縣河間衛江南宿遷縣興化縣邳州高郵州鹽城縣山東郟城縣魚臺縣地方今年重罹水災小民艱苦亦應加恩軫恤所有康熙二十四年下半年二十五年上半年地丁各項錢糧俱與豁免爾部速行該地方官通行曉諭務使人人均被恩膏以副朕愛育蒼生至意如有不肖有司官役借端朦混及私行重征者該督撫指名題叅從重治罪如該督撫徇隱不行糾

舉或經叅奏或被告發定行一併從重治罪爾部即遵諭行  
特諭

康熙二十五年閏四月二十二日

諭大學士勒德洪明珠王熙吳正治宋德宜學士麻爾圖牛鈕  
禪布蔡必漢噶思泰朕聞鳳陽徐州等處地方亢旱人民困  
苦學士麻爾圖率戶部賢能司官一人馳驛速往詳明據實  
踢看果民食維艱窘於生計速發鳳陽倉銀米一面賑濟一  
面奏聞其賑給事宜麻爾圖會同戶部議以聞

康熙二十五年七月初四日

諭工部右侍郎孫在豐

恭紀河渠志

康熙二十六年十一月二十六日

諭戶部朕惟自古帝王統御萬方又安九有單心懷保節愛攸  
先期於物力充裕爰以振業黎元俾膏澤旁流咸蒙美利朕  
自御極以來軫恤民依力圖休養惟理財為裕國之大經蠲  
貸為愛民之實政歷年敦崇節儉嚴核浮冒蓋欲為布德行  
惠之資頻年以來各省錢糧雖已次第蠲免但江蘇所屬各  
郡縣為財賦重地額徵錢糧甲於他省且累歲輸將供億効  
力維勤茲用大沛恩膏除漕項錢糧外所有康熙二十七年  
應徵地丁各項錢糧俱著蠲免二十六年未完錢糧亦悉與  
豁除又陝西省錢糧前雖已行蠲免但念該省人民用兵之  
際轉輸餽餉効力可念再宜加恩以引樂利其康熙二十七  
年應徵地丁各項錢糧及二十六年未完錢糧亦著俱與蠲

免爾部速行該地方官通行曉諭務使小民均霑實惠以副朕愛育蒼生至意如有不肖官吏借端朦混及私行重徵者該督撫指名題叅從重治罪如該督撫徇隱不行糾舉或經叅奏或被告發定行一併從重治罪爾部卽遵諭行特諭

康熙二十八年正月初二日

諭吏戶兵工四部朕統莅寰宇二十八年於茲早作夜思勤求治理務恤黎庶永圖乂安如黃運兩河運道民生攸係朕日切心勞比年工役雖漸有緒而應修應塞議論紛紜曩歲巡幸曾允淮揚士民所請疏濬下河前已興工尚稽底績屢經廷議請朕親行閱視今特諏吉南巡躬歷河道兼欲觀覽民情周知吏治所至沿途供億皆令在京所司儲備一切不取

之民間卽有日用應需該衙門於所在地方照市估平買不許錙銖扣執小民猶恐地方官吏不能悉體朕懷借名苛派供應今特頒諭嚴飭如有悖旨借端私征者察實卽以軍法從事地方文武大小官員不許與扈從官員指稱交戚輒通餽遺違者餽送收受人員並以軍法從事其扈從大小官員及隨往廉役如有橫行生事擾民者一併從重治罪朕茲巡省原以軫恤編氓咨諏風俗凡經過地方百姓各安生業務令屢無廢市隴不輟耕毋得倉皇驚避輒滋煩擾其軍民人等懷奸挾詐希逞私憤擅於駐蹕處所瀆行告訐者一概嚴禁儻有妄控除所告事不與准理外仍嚴加治罪爾部卽傳諭扈從大小官員人等並行令各該督撫於府州縣城市村

莊窮鄉僻壤徧懸告示備行曉諭務令通知以副朕惠愛元元至意特諭

康熙二十八年二月

諭總督傅臘塔王鵬巡撫洪之傑金鉉朕因省察黎庶疾苦兼閱河工巡幸江南便道至浙觀問風俗簡約儀衛鹵簿不設扈從者僅三百餘人頃經維揚民間結綵歡迎盈衢溢巷雖出其恭敬愛戴之誠恐致稍損物力甚為惜之朕視寓內編氓皆吾赤子惟使比戶豐饒卽不張結綵慢朕心亦所嘉悅前途經歷諸郡邑宜體朕意悉為停止又見百姓老幼男婦奔走雜還瞻望恐後未免喧譁擁塞念此行原以為民不嚴警蹕但人眾無所區別高崖水次或有傾跌之虞一夫不獲其所足軫朕懷此後止於夾道跪迎勿得紊亂追趨致有諸患著卽詳加曉諭使知朕愛民切實咸為遵行特諭

康熙二十八年二月十一日

諭扈從部院諸臣朕稽古省方咨求治理閱視河道期底平成凡有利於民生必令霑夫實惠茲行次浙省禹陵在望念大禹功德隆盛萬世永賴應行親詣以展企慕之忱其致祭典禮所司卽察例舉行政治所先在崇文教江南浙江為人文萃集之地入學額數應酌量加增永昭弘獎著該督撫詳議奏請江寧鎮江杭州駐防滿洲漢軍兵丁鎮守要地久歷歲時深用軫念應作何恩賚以彰優恤著該部議奏自南巡以來所經過地方官員除八法處分及列欵糾劾外凡因公註



誤降級留任者俱准與開復降級調用者著帶所降之級留任其經過地方見在監禁人犯除十惡及詔欵所不赦等罪並官員犯贓不宥外其餘自康熙二十八年二月十一日以前死罪及軍流徒罪以下已結未結俱著寬釋以示朕赦罪宥過之意備辦船隻地方各官効力勤勞著該督撫會同奉差官員確查具題各加一級繹夫供役勞苦亦著該督撫察明人數量給恩賞朕屢念民依特蠲租賦總期實德潤澤蒼生近見民間有建立碑亭稱頌德意者雖出羣黎感戴之誠但恐各郡皆然未免致損民力誠使閭閻殷阜則裨益良多碑亭何與焉嗣後亦宜停止江浙錢糧既經蠲豁猶慮有不肖有司借端詞訟朘削民生著該督撫嚴行禁飭至各處權

關原有則例朕舟行所至諮訪過關商民每不難於輸納額稅而以稽留關次不能速過爲苦權關官員理宜遵奉屢頒諭旨恤商惠民豈可反貽商民之累自今應力除積弊凡商民抵關交納正稅卽與放行毋得稽留苛勒以致苦累違者定行從重處分朕早夜孜孜惟冀官吏軍民士農商賈無一人不獲其所故於民生吏治圖維區畫務極周詳爾等可卽傳諭俾一體奉行稱朕意焉特諭

康熙二十八年三月二十一日

諭內閣朕巡行南省往視河道江南淮安諸地方自民人船夫皆稱譽前河道總督靳輔思念之不忘且見靳輔濬治河道上河隄岸修築堅固其於河務旣克有濟實心任事勞績昭

然曩革職太過其以原官致仕例復其原品

康熙二十八年七月二十二日

諭戶部朕前巡幸江南凡所經歷於編氓疾苦必詳加體察如傷念切每沛恩膏朕過邳州親見彼處田地多爲水淹沒耕耔旣無所施賦稅如何取辦其現在被淹田畝應納地丁及漕項錢糧俱行蠲免歷年逋欠亦盡與豁除該督撫卽行出示徧曉窮鄉仍不時廉察儻有不肖官員仍行私徵者題叅從重治罪以副朕愛惜民生至意爾部卽遵諭行特諭

康熙三十年十二月初四日

諭戶部朕撫馭區宇三十年以來早夜圖維惟以愛育蒼生俾咸臻安阜爲念比歲各省額徵錢糧業已次第蠲豁其歲運漕米向來未經議免朕時切軫懷所有京通各倉米穀樽節支給數載於茲今觀歷年儲積之粟恰足供用應將起運漕糧逐省蠲免以紓民力除河南省明歲漕糧已頒諭免徵外湖廣江西浙江江蘇安徽山東應輸漕米著自康熙三十一年始以次各蠲免一年至江寧京口杭州荊州大兵駐防地方亦應豫行積貯著將康熙三十一年起運三十年漕米各截畱十萬石存貯倉廩令該地方官敬慎守視以備需用爾部卽遵諭行特諭

康熙三十二年九月十六日

諭內閣江浙二省今年夏旱雖不成災秋收量必有限若漕糧照常徵收起運恐民食將至匱乏朕爲此常切軫念除浙江

漕糧已經改於今年蠲免外其江南漕糧今年或三分免一或免一半俟至該省應蠲年分將今年所免米石照數補徵起運於漕糧既無缺少官民大有裨益著滿漢大學士等會同戶部堂官倉場侍郎等作速確議具奏

康熙三十三年閏五月初十日

諭內閣保護中河堤岸之子堤

恭紀河渠志

康熙三十六年正月二十二日

諭大學士伊桑阿等揚州淮安徐州等處被災錢糧該總督巡撫奏請蠲免疏至即與全蠲

康熙三十六年六月十五日

諭提督江南學政學士張榕端提督浙江學政侍講張希良自古帝王治天下率以興賢育才為首務稽察前制各省學政皆用詞臣董率之任至重也近來士習未變文事未彰良由督學各官不能仰體朕意茲特命爾前往江南浙江等處提督各府州縣學政爾尚端軌儀崇經術勤勸課嚴坊刻振維新之典革積衰之弊毋炫華而遺實毋避怨以市恩俾士有真材國收實用南土人文所萃尤宜加意作新多方鼓舞以稱朝廷培植人材至意所屬司道府州縣及提調等官凡關係學政者聽爾據實考核及禮部題准申飭事宜俱當著實舉行向有傳諭嚴禁考試情弊爾當恪奉遵依至於本處督撫各有攸司不得互相干預如遇公事交接暨文移往來俱照平行其布按都三司接見禮儀往來文書有干係學政者

俱照巡撫衙門例行爾受茲委任務嚴絕情面一秉虛公振拔孤寒澄汰汙賤教士有程取文有法俾士風丕變時惟爾功如或蹈常襲故違命曠職亦惟爾罰爾其慎之故勅

康熙三十六年十月十五日

諭內閣下河地方

恭紀河渠志

康熙三十七年十一月二十五日

諭

戶部淮安揚州鳳陽等處比年水患頻仍浸漫隄岸田多淹沒耕獲無從百姓艱於粒食經朕時加軫恤屢賑屢蠲被災地方賴以安堵但念久歉之餘恐致資生匱乏朕履憫殷切未嘗稍釋於懷前此雖頻敷庥澤至再至三用裨羣黎生計猶恐開春東作農事艱難若不大沛恩施安能令小民各得其所著將海州山陽安東鹽城高郵泰州江都興化寶應壽州泗州亳州鳳陽臨淮懷遠五河虹縣蒙城盱眙靈璧等州縣并被災各衛所康熙三十八年一切地丁銀米等項及漕糧盡行蠲免務使民間均霑實惠以副朕體恤元元生息愛養至意爾部卽遵諭行特諭

康熙三十八年正月二十一日

諭

吏戶兵工四部朕撫馭寰區又安中外孜孜圖治宵旰勤民期於天下咸遂生成物無不得其所今邊烽永靖四方無事獨是黃淮爲患衝決時聞下河地方田廬漂沒朕軫念民艱曩曾屢遣大臣往令督理不惜數百萬帑金務期早綏黎庶乃歷年已久迄無成功今水勢仍復橫溢浸漫城闕沉沒隴

畝以致民多失業董其役者未有上策可以宜民時屢朕懷未嘗少釋在內諸臣咸請朕親臨指示以爲一勞永逸之圖方今春時雨水減少正宜講求疏濬以遂安瀾爰諏吉南巡親加勘閱更以吳地乃東南奧壤襟帶江湖勵俗省耕兼行臨視凡一切往返供億已皆俾辦於京師卽途次日用所須亦令各衙門照本地時值採買總於民間一無所累仍恐沿途官吏藉名科派致累閭閻故特頒諭嚴行申飭如有悖旨假託派索者察實卽以軍法從事該地方大小文武官員不許與扈從官員藉稱親舊擅相餽遺違者與受人員並以軍法從事其扈從大小官員隨行儉從人等如有橫行生事者一併從重治罪凡經過地方百姓各安生業皆如常時務令屢無廢市隴不輟耕毋得惶遽引避其軍民人等懷挾私怨受人指使擅於駐蹕處所輒行告訐者一概嚴禁不准仍照衝突儀仗例嚴加治罪爾部卽傳諭扈從大小官員人等併行各該督撫於各府州縣城市鄉村遍張告示備行曉諭務令億兆通知以副朕體恤惠愛至意特諭

康熙三十八年三月初七日

諭戶部朕君臨天下期於黎民樂業各獲其所凡興利除害之事靡不舉行蠲免賑濟之恩靡不下逮比年以來因淮揚所屬地方疊罹水患業已歲蠲額賦賑恤頻施又動支數百萬帑金責令在河諸臣於應挑應築之處酌量修理務使汜濫之水匯歸入海被淹之廬舍田畝盡皆涸出用底幹寧乃錢

糧竟爾虛費卒不能使積淹有歸田廬未涸民生未遂朕聞之惻然軫懷值茲四方無事之時欲將一切修舉事宜詳閱指示用是躬親臨幸沿途審視黃河水勢咨訪地方父老比至歸仁堤高家堰量度地形高下應挑應築一一明示河臣惟是被淹地方米價騰涌生計維艱朕目擊民依深用厯念著將漕糧截留十萬石於高郵寶應興化泰州鹽城山陽江都受災七州縣各留一萬石悉較時價減值發糶餘米三萬石著於邳州留八千石宿遷桃源清河安東四縣各留五千五百石亦較時價減糶此各州縣發糶之米著就道交與漕運總督河道總督邳州著遣司官一員前往監視再截留米十萬石於揚州淮安各收貯五萬石這應留漕糧不論何處

米石著就近截留爾部卽遵諭行

康熙三十八年三月初七日

諭總督于成龍

恭紀河渠志

康熙三十八年三月十三日

諭戶部東南爲財賦重地朕時加軫念頻歲以來雖在邊塞用兵之際未嘗不早夜殷殷睠懷寬恤茲以中外昇平特事巡省並閱河工比至江南親察民間饒瘠之狀見淮南北地方疊罹水患深用惻然已經屢蠲屢賑仍命截留漕糧減價平糶其餘各州縣固市肆安輯耕鑿恬熙而額賦浩繁民生拮据歷年逋負積算日增合行江蘇巡撫安徽巡撫所屬舊欠帶徵錢糧計及百萬念小民方供新稅復急舊逋物力維艱

勢難兼辦里井既多催科之擾官吏復滋叅罰之煩應沛特恩概行蠲豁除康熙三十三年恩詔內已經赦免外其三十四五六年奏銷未完民欠一應地丁錢糧米豆麥雜稅爾部行文該督撫察明俱著免徵務飭有司悉心奉行俾使窮簷蔀屋均霑實惠如有已徵在官詭稱民欠希圖侵蝕肥己者一經發覺定從重治罪朕身處宮禁與巡歷方隅無非孳孳民事但使閭閻豐足則國家裨益良多以此不惜蠲除頻敷德澤凡厥官吏軍民宜咸知朕意爾部卽遵諭行特諭

康熙三十八年三月二十二日

諭戶部朕因淮揚地方數被水患躬臨巡省目擊田廬淪沒之苦深加軫恤旣截留漕糧以濟民生仍蠲除積欠以紓民困其昨歲淮揚兩屬被災錢糧曾經該督撫具題部議照例減免三分今念百姓餬口維艱安能辦賦應破常格用沛特恩淮安府屬海州山陽安東鹽城揚州府屬高郵泰州江都興化寶應九州縣並淮安大河二衛康熙三十七年未完地丁漕項等銀一十九萬有奇米麥十一萬石有奇著全與蠲免爾部行文該督撫卽飭各州縣張示曉諭務體朕憫惻羣黎之至意俾窮鄉僻壤均霑實惠如有不肖官吏私徵侵蝕者察出定治重罪特諭

康熙三十八年四月初二日

諭戶禮二部朕子育黎元勤求治理日孜孜以施德澤厚民生爲急務而江浙二省尤東南要地朕時切軫念比歲以來蠲

豁田賦賑濟凶荒有請必行無災不卹雖漕項錢糧向未蠲免者亦曾特旨蠲免愛養之道備極周詳庶幾民生日益康阜用是乘輿時邁於視河事竣巡歷江浙咨訪民間情形見淮揚一路旣困潦災而他所過州縣察其耕獲之盈虛市廛之贏絀視十年以前實爲不及此皆由地方有司奉行不善不能使實惠及民所以小民雖懷愛戴之誠而朝廷恩澤卒未下究朕目擊屢懷亟思拯卹截留漕糧寬免積欠另有諭旨惟各鹽差關差向因軍需繁費於正額外令在差官員以所私得贏餘交納充用今思各官孰肯自捐私橐勢必仍行苛取商瘠民困均坐此弊著將加增銀兩一概停罷以紓商民之累其兩淮鹽課康熙三十六年曾加增四十萬兩今恐商人辦課維艱有漸致匱乏者著減去二十萬兩此外有應行應革事宜朕還都以後仍加商確次第舉行該督撫藩臬皆地方大吏亦著悉心體訪凡有可爲民興利除害者作速勘實陳奏嚴革雜派禁止刁訟然後胥吏不能作奸良民得以安業儻官吏有悖旨妄行者許商民首告該督撫察出卽行叅奏朕視民如傷惟恐一夫不獲其所茲值海寓昇平兵革不事正當與民休息之時故特渙沛德音減徵寬稅以爲閭閻留有餘之力萬一嗣後別有急需或不得已而稍議加增想在小民亦能共諒朕懷輸將之恐後也至於江南浙江人文稱盛入學名數前已酌定增額今著於府學大學中學小學各增五名舉行一次以示獎勵人才至意爾部卽遵諭



行特諭

康熙三十八年四月十六日

諭戶部朕巡幸江南遍察地方疾苦深知民間生計艱難故將通省積欠錢糧盡行蠲免所過州縣有被災甚重者俱經拯濟務俾得所茲聞鳳陽府屬去歲潦災甚重是用破格加恩以示優卹康熙三十七年該府屬壽州泗州亳州鳳陽臨淮懷遠五河虹縣蒙城盱眙靈璧十一州縣並泗州一衛未完地丁漕項等銀米著一概免徵爾部行文該督撫卽飭該地方有司張示曉諭令窮鄉僻壤咸悉朝廷曲軫災黎之至意如有不肖官吏悖旨私徵使百姓不霑實惠者察出定治重罪爾部卽遵諭行特諭

康熙三十八年十一月初五日

諭戶部朕思小民生計惟農畝是賴必年穀收成斯衣食無缺淮揚所屬海州等州縣衛接年河流浸漫田廬編氓艱於粒食朕心深切軫念已將康熙三十八年錢糧俱行蠲免今春南巡目睹民間疾苦恐致失所復將康熙三十七年未完錢糧盡與豁除諭令所司將沿河堤岸堅固修築乃修防未竣夏秋又致沖決田廬盡沒水中特命該撫往駐被災地方動支積貯米穀並將漕糧截留親行賑給今念清口河流未通民田仍遭淹沒耕獲無從百姓餽粥尚且艱難來年租賦安能輸辦著將這被災海州山陽安東鹽城大河衛高郵泰州江都興化寶應等州縣衛康熙三十九年地丁銀米等項及

漕糧漕項銀兩盡行蠲免爾部速令該督撫通行曉諭務俾均霑實惠以副朕拯卹災黎至意如有不肖官役朦混侵冒仍行私徵者該督撫嚴察指叅從重治罪爾部卽遵諭行特諭

康熙三十九年三月初二日

諭 戶部淮揚等處百姓頻年罹於水災未寧幹止朕心時切軫念比歲以來多方優恤蠲免賑給靡不舉行去年春朕親履河干目擊小民田廬皆被滄沒災黎艱於粒食益為惻惻於懷爰命地方官按戶賑濟又將截留漕糧發賑平糶俾得贍養上下兩隄岸前雖屢發帑金修築迄無裨益去年二月面諭河工諸臣速行修治至今尚無成效復遴選廷臣同往經理無非軫懷民瘼欲令黃運兩河隄岸速成斯民早安生業耳念水患一日不除則百姓一日不得耕種思是深以為慮著將今年漕糧截留二十萬石存貯淮揚地方備用爾部卽遵諭行特諭

康熙四十二年二月初七日

諭 河道總督張鵬翮 恭紀河渠志

康熙四十二年三月初二日

諭 河道總督張鵬翮 王公堤

康熙四十二年三月初三日

諭 河道總督張鵬翮 高堰工程

康熙四十二年三月初三日

諭河道總督張鵬翮

王家營

康熙四十二年三月初四日

諭河道總督張鵬翮

清口西壩

以上恭紀河渠志

康熙四十二年三月十八日

萬壽恩詔朕為天下生民主宵旰勤勞勵精圖治凡國家之休戚閭閻之樂利晷刻之間無不注意於此天下之大兆民之眾朕誰欺欺天乎至今四十餘載親歷饑饉者不知其幾南北用兵者不知其幾人心向背者不知其幾天變地震者不知其幾自責涼德不能撫育履冰臨淵兢業惟守仰賴

上天眷佑

祖宗厚德幸生創業未久之際方免墜失今海寓昇平年歲稍和生民俱已樂業邇來諸王大小臣工士庶因朕五旬輿情肫切屢請加上尊號朕堅意固辭不允所請蓋朕不以名譽稱揚為尚惟以海內富庶為心是以屢蠲賦役頻省刑罰總欲使老安少懷風俗淳厚漸幾於康乂隆平之治近因淮黃告成乃東南要務再授方略望有善後朕不辭勞瘁親往閱視見畿輔山左江浙等省耆老人民俱中心愛戴雖童穉亦咸歡欣瞻仰是知民心皆一用是益深軫念視切如傷所以星夜回鑾茲特大沛弘恩普施遐邇庶幾民生咸登壽域和協徧滿寰區所有應行事例開列於後於戲安民則惠益弘逮下之恩御眾以寬聿溥好生之德布告天下咸使聞知

康熙四十二年十月初八日

諭工部覽河臣奏一道

恭紀河渠志

康熙四十五年十月二十五日

上諭戶部朕子育黎元日求所以休養利濟之道念惟賜租減賦實有裨益於民生直隸各省錢糧次第全蠲一年者業經數舉獨是歷年逋負積累加增舊稅新徵勢難兼辦縱使少寬民力分年帶輸而督令續完仍多拮据朕睠懷及此深切軫恤是用蠲逋己責大沛恩膏俾閭閻獲免追呼官吏亦不罹叅罰直隸山東積欠錢糧今年俱已蠲免其山西陝西甘肅江蘇安徽浙江江西湖北湖南福建廣東各省自康熙四十三年以前未完地丁銀二百一十二萬二千七百兩有奇糧十萬五千七百石有奇著按數通行豁免或舊欠已完在官而現年錢糧未完足者亦准扣抵諭旨到日各該撫立行所屬張示徧諭有不肖有司以完作欠朦混銷算及開除不清者該督撫卽時題叅嚴加治罪爾部卽遵諭行特諭

康熙四十六年十月初七日

諭戶部江南地方頻年雨暘時若百穀順成閭井黎氓咸得遂生樂業但民間夙鮮蓋藏禦荒無術一遇歲歉卽有匱乏之憂朕屢次南巡素所洞悉今年自夏入秋雨澤愆期該督撫先後奏至因念小民久未被災驟罹荒旱所關甚鉅隨命九卿等速同詳議應行事宜業經勅令停徵并發倉穀賑濟顧倉儲數少未足徧給惟各州縣截留漕米可以實惠及民目下時已屆冬總漕桑格無事著會同總督邵穆布巡撫于準

親歷各州縣被災地方備加察勘將今年所徵漕糧每州縣或留八九萬石或留十萬石酌量足支賑給之數分別多寡存留支散及今漕米尚未開兌截現收之糧以濟待哺之衆實於民生大有裨益此朕殷殷懷保赤子軫念如傷之至意爾部卽移文該督等實心奉行仍開具賑濟實數奏聞特諭  
康熙四十六年十一月初二日

諭戶部江浙地方賦役殷繁倍於他省朕屢經巡歷時切軫懷比年以來業已節次敷恩頻行蠲貸頃因兩省偶被旱災隨命按數減徵豁免漕欠並分截本年漕糧令該督撫親往散賑猶念民間素鮮儲蓄生計不充非更加格外滋培則荒歉之餘未能驟臻康阜茲特再施膏澤用弘休養康熙四十七年江南浙江通省人丁共額徵銀六十九萬七千七百餘兩著悉與蠲免其今年被災安徽巡撫屬七州縣三衛江寧巡撫屬二十五州縣三衛應徵地畝銀共二百九十七萬五千二百餘兩糧三十九萬二千餘石浙江二十州縣一所應徵地畝銀九十六萬一千五百餘兩糧九萬六千餘石四十七年亦俱著免徵所有舊欠帶徵銀米並暫停追取俟開徵時一併輸納務使小民一歲之內絕跡公庭安處隴畝俾得優游作息經理農桑庶幾閭閻氣象可以日加豐豫諭旨到日該督撫體朕孳孳惠愛黎元至意各飭有司實心奉行仍張示通曉令咸知悉儻蠲除不實致有侵冒察出定治重罪爾部卽遵諭行特諭

康熙四十六年十一月二十三日

諭江浙在京官員大學士張玉書尚書王鴻緒等朕在宮中無刻不以民間疾苦爲念恐遇旱澇必思豫防至巡幸各省於風俗民情無不諮訪卽物性土宜皆親加詳考每至一方必取一方之土以驗試其燥濕今歲南巡江浙見天氣久晴所經河渠港蕩之水比舊較淺卽慮夏間或有亢暘之患是時麥田雖甚豐稔然南方二麥用爲麩蘖者多不似北方專資麩食南方惟賴稻米北方則兼種黍稷梁粟有攜北方黍稷及蔬菜之類至南方種植者多不收穫此水土異宜不可強也且江浙地勢卑下不雨則蒸濕人不能堪有雨則涼人皆爽豁雖地稱水鄉而水溢易洩澇歲之爲患尚淺旱歲則爲

患甚劇北方經月不雨亦尚無礙南方夏秋間經旬缺雨則田皆坼裂禾苗漸槁矣喜雨亭記云十日不雨則無禾蓋謂此也江浙農功全資灌溉今河渠港蕩比舊俱淺者皆由素無瀦蓄所致雨澤偶愆濱河低田猶可戽水濟用高仰之田力無所施徃徃三農坐困朕茲爲民生再三籌畫經久之計無如興水利建牖座蓄水灌田之爲善也江南省之蘇松常鎮及浙江省之杭嘉湖諸郡所屬州縣或近太湖或通潮汐所有河渠水口宜酌建牖座平時閉牖蓄水遇旱則啓牖放水其支河港蕩淤淺者並宜疏濬引水四達仍酌量建牖多蓄一二尺水卽可灌高一二尺之田多蓄四五尺水卽可灌高四五尺之田準此行之可俾高下田畝永遠無旱澇矣爾

等其以朕意曉諭諸臣詳議以聞

康熙四十六年十一月二十九日

諭工部朕宵旰勤民視如赤子無一時一事不思為閭閻圖經久之計江南浙江生齒殷繁地不加增而仰食者日衆其風土陰晴燥濕及種植所宜迥與西北有異朕屢經巡省察之甚悉大抵民恃田畝爲生田資灌溉爲急雖東南名稱水鄉而水溢易泄旱熯難支夏秋之間經旬不雨則土坼而苗傷矣濱河低田猶可戽水濟用高仰之地力無所施往往三農坐困朕茲爲民生再三籌畫非修治水利建立牐座使蓄水以灌輸田疇無以爲農事緩急之備江南省蘇州松江常州鎮江浙江省杭州嘉興湖州各府屬州縣或近太湖或通潮

汐宜於所有河渠水口度地建牐隨時啓閉水有餘則宣洩之水不足則潴蓄以備用其有支河港蕩淤淺者宜並加疏濬使引水四達仍行建牐多蓄一二尺之水卽田高一二尺者資以灌溉矣行之永久可俾高下田畝無憂旱潦此於運道無涉而於民生實大有裨益今漕運總督與江浙督撫方料理截漕散賑爾部速移文該督撫等令將各州縣河渠應建牐蓄水之處並應建若干座通行確察明晰具奏爾部卽遵諭行特諭

康熙四十七年五月初八日

諭工部朕南巡閱河時見洪澤湖風浪危險隄岸陡立商民船

隻觸石損壞傷人甚多朕心時切軫念因特令河臣沿湖隄創設救生木椿自設椿以來數年內竝未損船傷人於商民大有裨益此椿應時加增修愈多愈善嗣後著江寧蘇州杭州三處織造每歲於節省銀內各捐五百兩解送總河衙門以備救生椿之用該督逐歲修理存案不必入奏銷如不實行修理於別項支用者從重治罪

康熙四十七年十月十六日

諭戶部朕屢次南巡見閭閻殷阜之象遠不逮於舊時故於民生風俗無不一一諮訪雖不時蠲免額賦停徵積逋僅可支吾卒歲絕無餘蓄且今承平既久生齒日蕃食漸不充用多不給亦理勢之所必致朕每念及此未嘗不爲惻然去年江

南浙江二省俱被旱荒多方軫恤始蘇民困迨今歲復報潦傷旋經照例蠲賑竝下詔書留漕資濟但歲再不登生計益匱欲令辦賦力必難供朕於國家一切經費累年撙節帑藏充裕以此渙敷膏澤藏富於民俾得盡力農桑衣食滋殖百姓既足國用何憂康熙四十八年除漕糧外江南通省地丁銀四百七十五萬四百兩有奇浙江通省地丁銀二百五十七萬七千兩有奇著全行蠲免所有舊欠帶徵銀米仍暫停追取此朕因江浙二省爲東南重地特於格外施仁用弘休養之至意該督撫各飭有司張示遍諭務令窮鄉鄙屋咸共知悉儻或別借事端侵冒徵派事發定從重治罪爾部卽遵諭行特諭



康熙四十八年十月二十五日

諭戶部今歲入夏以後朕因南方二麥不登北地亦被微潦宵  
旰軫慮甚切焦勞繼而畿輔稔收三吳秋熟兼以四方奏報  
咸獲有年朕心始爲稍慰夫水旱災傷事所時有而小民皆  
如赤子一以疾苦見告卽不忍恣置於懷今念江南淮安府  
揚州府徐州三屬地卑積水被災獨重秋禾未播種者甚多  
雖本年錢糧業經全免又曾遣官分賑而失業之民宜加格  
外之恩以弘愛養康熙四十九年淮揚徐三屬邳州等十九  
州縣三衛額徵地丁銀五十九萬三千八百兩有奇著通行  
蠲免又河南省歸德府屬商邱等六縣山東省兗州府屬濟  
寧等四州縣或被夏災或被秋災雖已各依分數例免額賦  
竝宜更施膏澤用厚民生康熙四十九年商邱等縣應徵地  
丁銀二十萬二千四百兩有奇濟寧等州縣應徵地丁銀一  
十四萬六千六百兩有奇俱著通行蠲免其應蠲免州縣有  
舊欠未完錢糧亦著停徵一年諭旨到日各該督撫嚴飭有  
司體朕殷殷軫恤災氓至意張示徧諭悉心奉行務俾窮鄉  
僻壤均霑實惠如有不肖官吏借端私徵者卽行察叅爾部  
卽遵諭行特諭

康熙五十一年

上諭戶部朕宵旰孜孜勤求民瘼永爲惠下實政無如除賦蠲  
租除每歲直省報聞偶有水旱災傷照輕重分數豁免正供  
仍加賑卹外將天下地丁錢糧自五十年爲始三年之內全

免一週使率土黎庶普被恩膏除將直隸奉天浙江福建廣東廣西四川雲南貴州及山西河南陝西甘肅湖北湖南各直省康熙五十年五十一年地丁錢糧一概蠲免歷年舊欠錢糧一併免徵外所有江寧安徽山東江西各撫屬除漕項外五十二年應徵地畝銀共八百八十二萬九千六百四十四兩有奇人丁銀共一百三萬五千三百二十五兩有奇俱著察明全免其歷年舊欠銀二百四十八萬三千八百二十八兩有奇亦並著免徵計三年之內總免過天下地畝人丁新徵舊欠共銀三千二百六萬四千六百九十七兩有奇各該督撫務須實心奉行體朕軫念民生至意如有侵欺隱匿使惠不及民借端科派者督撫嚴行察叅督撫失察事發之日亦嚴加究治諭旨到日立即徧示城郭鄉村咸使知悉爾部卽遵諭行特諭

康熙五十一年

上諭朕自沖齡卽好讀書亦好寫字一切經史靡不徧閱成誦在昔賢哲所著之書間或字句與中正之理稍有未符或稍有瑕疵者後儒卽加指摘以爲理宜更正惟宋之朱子註明經史闡發載籍之理凡所撰釋之文字皆明確有據而得中正之理今五百餘年其一句一字莫有論其可更正者觀此則孔孟之後朱子可謂有益於斯文厥功偉矣朕旣深知之而不言其誰言之於朱子宜何如表章崇奉爾等與九卿會同具議以聞

康熙五十二年

上諭海宇承平日久戶口日繁地畝並未加廣宜施寬大之恩  
共享恬熙之樂嗣後直隸各省地方官遇編審之期察出增  
益人丁止將實數另造清冊奏聞其徵收錢糧但據康熙五  
十年丁冊定爲常額續生人丁永不加賦仍不許有司於造  
冊之時藉端需索用副朕休養生息之意

康熙五十六年

上諭戶部朕撫馭寰宇五十餘年夜寐夙興爲小民勤求生遂  
凡率土遠近皆期共享樂利聿成家給人足之休未嘗一日  
不廛諸懷也數十年以來各省正賦屢經全免歷年積欠亦  
已蠲徵偶有雨澤愆期或發倉廩散給或截漕糧賑救不惜

數萬萬金錢米穀頻沛恩施誠念窮簷之艱慮其至於顛連  
失所耳近者民力雖已稍紓然念分年帶徵銀兩若不格外  
優寬則小民一歲所獲分納二年之賦以其贏餘養贍室家  
斷難充足朕每懷及此軫惻良深宜更加殊恩通行豁免今  
將直隸安徽江蘇浙江江西湖廣西安甘肅等八處帶徵地  
丁屯衛銀二百三十九萬八千三百八十兩有奇概免徵收  
其漕項雖例不准免亦著破格施恩將安徽江蘇所屬帶徵  
漕項銀四十九萬五千一百九十餘兩米麥豆一十四萬六  
千六百一十餘石內蠲免各半爾部卽行文該督撫嚴飭所  
屬實心奉行徧加曉諭俾民間無徵催之累均沾實惠用稱  
朕撫卹羣黎至意儻有不肖有司借端朦混私行徵收者該

督撫嚴察叅處如該督撫失察一併從重處分爾部卽遵諭  
行特諭

江南通志首卷 一之二

江南通志

首卷 二之二

聖祖仁皇帝御製

南巡筆記

康熙甲子春日有以時值上元請行封禪及巡狩燔柴諸典  
禮者夫朕涼德菲躬臨御海宇邇年以來水旱兵戈民亦勞  
止雖邀天庇佑四海蕩平萬姓樂業實未有豐功偉烈足以  
昭示來茲何敢效法前人銘功紀德至於巡狩古天子所以  
周省侯國使諸侯肆覲明堂考其政績今天下之權統一於  
內督撫之賢不肖朕皆得而知之又無事於巡狩之名也惟  
是近畿郡邑屢經巡幸補助時施而東南黎民風俗尚未周

知乃於秋九月陳請

兩宮暫違定省二十八日出京師經河間過德州閱濟南城觀  
趵突泉題曰激湍百姓遮拜馬首口戶繁盛比屋可封昔稱  
臨淄之間肩相摩轂相擊者今尚有遺風焉十一日至泰山  
石徑峻嶒緩步登陟四十里御障崖瀑水懸流五大夫枯松  
猶在巖畔或亦後人繼植者入南天門捫秦時無字碑至孔  
子小天下處真可收羅宇宙暢豁襟懷題普照乾坤雲峰諸  
字宿泰山巔月色清明賦詩遣興來日登日觀峰看扶桑日  
出下山祀於嶽廟嶽爲五方之長發生萬物故躬祀之爲蒼  
生祈福十三日雨雪駐蒙陰縣侍臣云明日小雪喜其應候  
詰朝雪霽望蒙山峰頂半入雲霧或隱或見其上石衣土人

攀縋取之名蒙山頂上茶嘗考四川雅州有蒙山五峰極高  
峻上產甘露茶世所傳者或雅州之蒙山也渡沂水取魚既  
多且鮮因遣使馳進

兩宮以志思戀之懷蒞花鋪青淮之界居人輻輳十八日發宿  
遷縣閱黃河北堤岸一百八十里頻年水患工役浩繁民俗  
罷敝不若山左之庶饒渡河舟行過清江浦淮安府商賈往  
來舟楫如織寶應縣高郵州邵伯鎮皆以湖水汎濫未復故  
道居人草屋臨流牀竈半在水中朕甚憫焉登岸步行十餘  
里親察水勢召集耆老秀才細訪其故皆云自海口壅塞水  
無所歸二十年來田畝已成巨浸賦詩紀事思所以拯濟之  
廿三日抵維揚市肆繁華園亭相望遊平山堂天寧寺百姓

持香夾道意甚誠敬平山堂乃宋臣歐陽修所建修以文學侍從之臣出知揚州爲政之暇優游談讌傳爲佳話故朕詩有文章太守心偏憶之句廿四日將由儀真幸江寧府忽遇順風可以速達京口遂乘沙船順流而下波恬浪靜瞬息七十里沙船江中戰艦也自岳州長沙用兵以來多得其力今河海清晏當時戰具僅供渡江之用然安不忘危朕於此時未嘗不念艱難用武之際次早登金山孤巒隱岫屹峙大江中飛閣流丹金碧照灼更有一峰離立曰善才石郭璞墓在其西上有妙高臺留雲亭朝陽洞下有中冷水稱天下第一泉朕率扈從諸臣一一探眺縱目千里題江天一覽四字并賦二詩竹林禪院在鎮江府城南五里曲徑逶迤茂林修竹高者四五丈大者圍尺青葉碧枝陰森崖谷實北地之所未有晚而登舟揚帆丹陽縣常州府無錫縣俱未及泊一晝夜行三百六十餘里達姑蘇舟人云從無如此之速者廿七日由楓橋入閶門登城閱視士民觀瞻莫不抃舞有獻賦頌者是日駐蹕城中念職事人役辛勤遠來遍賞白金聽其各帶方物以示體恤廿八日回鑾過虎邱山不甚高亭榭欄檻布滿其上千人石高下可容千人傳爲生公講經處故旁有點頭石劔池在夾崖中殊可觀平遠堂俯瞰虎邱之背田疇林木望若錯錦蘇民仍列酒坊茶肆各安生業管絃競奏覺有昇平景象然徒事紛奢罔知務本未若東北風俗之樸實耳夜坐舟中與侍臣高士奇探論古今興廢之跡或讀尚書左

傳及先秦兩漢文數篇或談周易或賦一詩每至漏下三十刻不倦日以為常蓋詩書意味深長不似耳目之好易於煩厭也舟過無錫縣遊錫山觀惠泉石甃八角池水色渟泓味較玉泉遠不相及不知前人何以稱之為第二泉二十九日由丹陽縣陸行初一日過句容縣蜿蜒石堤數十里抵江寧府雨花臺在城南登之則江山城郭歷歷可見報恩寺規制弘壯寶塔九級金碧琉璃盡鏤梵相結構之巧殆竭人工非前代內帑所修不能至此城中闐闐充實烟火萬家景物太平昔稱六朝佳麗今亦不減大都也明日祭明洪武陵見其頽廢勅地方官禁護之過明故宫僅存遺趾不禁慨然作過金陵論并賦一詩登觀星臺望後湖題曠觀二字又明日再

遣使進

兩宮方物閱鎮將射於教場頒賜扈從諸臣幣帛督撫御衣初四日發江寧府泊燕子磯峭壁臨江亦有勝致初十日閱高家堰堤工望洪澤湖汪洋千頃復由河南岸行一百八十里過桃源縣十一日渡河至宿遷次日駐蹕蒞花鋪自郟城沂州取道東兗渡沂濟祊汶泗諸水泗水出陪尾山下泉林寺側石穴吐水衆泉俱導古樹成林有石碑刻子在川上處然闕里志載孔子觀川亭在尼山宣聖廟側未知孰是十六日長至節天氣晴暖無朔風祁寒扈從諸人莫不欣喜十七日過少昊陵顏子林駐蹕曲阜縣南十八日黎明祀於闕里齋心穆穆若有所見禮畢坐詩禮堂命孔氏子孫講周易大學

遍觀車服禮器及漢唐碑版檜樹在大成門內古幹蒼然苔  
蘚潤澤真靈蹟也敬想至聖道冠百王前代留金銀器具皆  
人力可辨獨以仗前曲柄龍蓋留廟中并書萬世師表四字  
過闕里詩古檜賦出北門醜酒孔子墓下伯魚墓在孔子墓  
東十餘步子思墓在其前西有子貢廬墓之所左有宋真宗  
駐蹕亭林中奇樹葱鬱未可計數行三十里駐蹕兗州府杜  
甫所謂浮雲連海岱平野入青徐是也念周公制禮作樂道  
接文武頃過曲阜未得躬謁廟庭特製祭文遣親藩代祀之  
遂由汶上東阿高唐至德州亟欲定省

兩宮兼程而歸是行也往返數旬所歷山東江南諸郡縣日以  
周諮民隱體察吏治爲首務行道之頃復得覽其山川憑弔  
古蹟至於地方利弊則將有以斟酌損益焉率筆記之示朕  
之不徒事遊豫也

恭侍

皇太后駕臨金山記

朕臨馭以來緬維

祖宗付託之重孜孜圖治宵旰不遑茲幸中外清平無事則裕  
民肅吏以登上理端在斯時顧朕身居九重慮周蔀屋閭閻  
疾苦容或壅於上聞又淮黃濬築務繁非親行相度亦無由  
底績於是載舉南巡之典以諮求民瘼然上念

皇太后春秋亦高矣誠恐違離日久定省有缺於心歎然用是  
敦請同行謹擇於今年二月之吉朕率諸子捧



鑾輿登仙鶴發自潞河一路問安視膳無間

宮闈朕心少憚惟

皇太后天性仁慈軫念民隱尤切每見田家作苦則指謂諸子曰稼穡艱難如此汝輩生長深宮可勿念乎諸子悉受教惟謹卽朕日祇聆

懿訓所至布德施惠惟恐一夫不獲

聖慈每聞之必爲色喜顧謂諸子曰汝父皇愛民如是太平可永保矣老身爲加一飯蓋盛德之下逮如此河工旣闕畢朕將南由吳會歷武林取道建業以歸乃復奉

慈駕南臨於四月之望自瓜步渡江江中有峰聳峙曰金山亦名勝也山椒庭院清幽齋堂闕邃爰掖

慈幃於斯駐蹕焉而是日天氣晴和江光如鏡帆檣上下烟樹

氤氳

皇太后隨意矚眺

天懷舒暢朕率諸子進蔬茗獻筍芋卽山櫻沼芡並荷

親嘗曰田間味何可棄也蓋

皇太后秉躬謙抑雖瞿曇蘭若亦施恩禮又

聖澤所加首先笑獨諸凡村嫗田婦罔不攜持童穉環繞翟車仰瞻宮扇一時

懿綸溫慰賞賚駢蕃而臣僚命婦之嫻於禮者亦皆環珮霞帔伏迎道左親炙

鑾輿遠近傳爲盛事山陬海澨婦孺旣稱兕觥而祝

慈壽者且數千里趾相接也猗與休哉朕觀從古陰教如省繯  
觀獲載在禮經卽前代宣宗亦嘗親奉母幃巡覽畿甸賦詩  
紀事侈爲美談朕茲幸際昇平太和豫順合億兆之歡心以  
隆尊養亦庶幾以孝治光海宇之意而

皇太后之徽音懿行可臚彤管爲萬世母儀法者堯且古罕觀  
也朕謹熏沐拜紀勒諸貞珉以垂奕禩云

金山江天寺碑

大江之中有山岌峩巖巖湧波濤而傑出者無如金山山之  
上高閣飛棟軒然四列凡夫日月之蔽虧風烟之噴薄帆檣  
樓堞鳧魚之出沒隱見於其中者舉可俯而有也夫岷山之  
源其始濫觴及乎建瓴而下近縈巴蜀遠跨荆揚數千里而  
歸墟於大壑滔滔南紀昔人目之天塹當六代時偏安建業  
江之左右遂爲重鎮是山以卷石屹乎中流引淮泗苞吳會  
可不謂天下之雄觀形勢之極勝者哉今四海一家書同軌  
合纖塵不揚斥埃無警舟車則萬國霧會筐篚則九域星馳  
是山也信足以爲登臨之美蓋異夫昔之憑藉江山以爲險  
者矣朕南巡過此停憩山寺撫長江之安流見水天之相接  
曠焉興懷書江天一覽四字畱之寺中爰命葺而新之不以  
勞吾民事竣請額其瑰壯巨麗當益足以增江山之奇矣因  
憶舊觀浩淼澄泓空闊無際猶可心會遂名之曰江天寺云  
過金陵論

金陵禹貢揚州之域秦立郡縣爲秣陵兩漢因之孫權特稱

建業東晉及宋齊梁陳地號佳麗隋唐之間六朝舊跡漸致  
湮沒南唐李氏始更築城名金陵府明有天下建都於此窺  
明太祖之意以爲宅中圖大控制四方千百世無有替也歲  
在甲子冬十一月朕省方南來駐蹕江寧將登鍾山酌酒於  
明太祖之陵道出故宮荆榛滿目昔者鳳闕之巍峩今則頽  
垣斷壁矣昔者玉河之灣環今則荒溝廢岸矣路旁老民踈  
而進曰若爲建極殿若爲乾清宮階礪陛級猶得想見其華  
構焉夫明太祖以布衣起淮泗之間經營大業應天順人奄  
有區夏頃過其城市閭閻巷陌未改舊觀而宮闕無一存者  
覩此興懷能不有吳宮花草晉代衣冠之歎耶昔人論形勢  
之地首推燕秦金陵次之然金陵雖有長江之險爲天塹而  
地脉單弱無所憑倚六朝偏安弗克自振固曆數之不齊或  
亦地勢使然也明自文皇靖難之後嘗以燕京爲行在宣德  
末年遂徙而都之其時金陵臺殿苑囿之觀聲名文物之盛  
南北並峙遠勝六朝迨承平旣久忽於治安萬曆以後政事  
漸弛宦寺朋黨交相構陷門戶日分而士氣澆漓賦斂日繁  
而民心渙散鬪賊以烏合之衆唾手燕京宗社不守馬阮以  
嚮僞之徒託名恢復僅快私仇使有明艱難創造之基業未  
三百年而爲邱墟良可悲夫孟子曰天時不如地利地利不  
如人和有國家者知天心之可畏地利之不足恃競競業業  
取前代廢興之蹟日加儆惕焉則庶幾矣

南巡詩一

晚經淮陰

淮水籠烟夜色橫  
棲鴉不定樹頭鳴  
紅燈十里帆檣滿  
風送前舟奏樂聲

平山堂

宛轉平岡路向西  
山堂遺構白雲低  
簾前冬暖花仍發  
簷外風高鳥亂啼  
仙仗何嘗驚野夢  
鳴鑣偶爾過幽棲  
文章太守

心偏憶

歐陽修自題平山堂詞有文章太守之句

墨灑龍香壁上題

天寧寺

小艇沿流畫槩輕  
鹿園鐘磬有餘清  
門前一帶邗溝水  
脉脉常含萬古情

由儀真乘巨艦至京口

長江萬里開鴻濛  
高檣巨楫乘艤臙  
儀真京口路百里  
挂帆瞬息凌長風  
汀蘆洲樹看歷歷  
波恬浪闊光融融  
湍流直下入滄海  
遠源上與岷峩通  
山川斷續合雲霧  
日月照耀浮虛空  
舟行迅速疾飛駛  
恍聞擊鼓馮夷宮  
桅樓高據極觀眺  
奇縱豁達舒心胸  
年來江漢罷桴鼓  
河海清宴絕戰攻  
舳艫間繫沙岸側  
水師捲甲懸長弓  
羽葆南巡渡揚子  
居安更念艱難功

金山

并序

金山在大江中南  
眺潤州北臨瓜步  
登陟其上縱目千里  
泱泱乎大觀也  
朕率扈從諸臣  
歷覽諸勝江山之奇  
未有逾於此者

一覽江天勝東南勢盡收帆檣來極浦臺榭起中流路出丹崖上煙同碧漢浮登臨豁心目浩蕩俯滄洲

試中泠泉

緩酌中泠水會傳第一泉如能作霖雨霑灑遍山川

妙高臺

臺高絕衆鳥臨眺暢清襟渺渺沙洲樹青青遠岸岑波濤巖下接洞壑檻邊深江水明如鏡彌徵天地心

鐵甕城

萬里晴江擁舳艫城高鐵甕接康衢遺銘欲探華陽蹟舊宅難尋海岳圖半面煙嵐雄北固一方形勢控東吳龍舟漫道巡行盛多恐深居政未敷

竹林禪院在潤州城南竹徑數里

一徑入深竹數里來上方叢生巖磴密枝拂雲煙長華旗出林際芝蓋停三陽颯颯吹霜風碧葉紛翺翺山齋頗幽寂萬籟含虛光觸物感予懷歌彼淇澳章

夜過丹陽

錦纜徐牽夜未停遙天煙靄淡疎星居人兩岸明燈火早是輕帆過驛亭

錫山

朝遊惠山寺閒飲惠山泉漱石流仍潔分池溜自圓松間幽徑闢巖下小亭懸聊共羣工濯天真本浩然

吳閶

鳴鑾獨上高城望巷陌遙通水寺斜土俗惟知鬪歌舞閭閻  
不解種桑麻鳥啼茂苑千年樹霜冷吳宮十月花聲教四方  
猶未訖願將淳樸變繁華

虎邱

小阜迴岡落照紅長廊曲榭構西東獨憐劍石潺湲水霸業  
銷沉在此中

句容道上

漸入茅山境來當農暇時但看初日上未覺朔風吹碧斂寒  
塘水紅垂野樹枝江南經幾郡民俗欲周知

雨花臺

何地飛花雨晴空無片雲江山恣遐矚草樹出清芬城郭參

差見樓臺遠近分人家百萬戶煙火盡氤氳

幸報恩寺

鳳刹高懸上界燈珠缸壁帶一層層平臨下見諸天小晴日

江山萬里澄

駐蹕金陵以方物寄獻

兩宮

深宮違定省經月戀晨昏幸土方為養蒼生共戴尊題書千  
里重託物寸心存遣使旌門外踟躕望九閭

金陵舊紫禁城懷古

秣陵舊是圖王地此日鸞旗列隊過一代規模成往蹟六朝  
興廢逐流波宮牆斷缺逃青瑣野水灣環剩玉河治理艱勤

重殷鑒斜陽衰草繫情多

示江南大小諸吏

東南財賦地江左人文藪時巡歷此疆民事日探剖風俗貴  
淳龐紛奢詎能久澄清屬大吏表率羣僚首郡縣布慈和愷  
悌歌父母民者國之本生計在畎畝六府既孔修三事安可  
後教化默轉移各須盡官守戶使敦詩書人知崇孝友庶幾  
遠邇氓皞皞登仁壽誥誠申予懷斯言慎不負

燕子磯夜泊

巍峩一片江頭石千載人傳燕子磯疑有鼉鼉藏窟宅時聞  
鐘磬出山扉牙檣緩住寒煙淨羽衛周連夜火圍沙岸聲聲  
動行漏蘆花深處雁驚飛

高郵湖見居民田廬多在水中因詢其故惻然念之

淮揚罹水災流波常浩浩龍艦偶經過一望類洲島田畝盡  
沉淪舍廬半傾倒熒熒赤子民棲棲臥深潦對之心惕然無  
策施襁褓夾岸羅黔黎踣陳進耆老諮諏不厭頻利弊細探  
討饑寒或有由良慚奉蒼顛古人念一夫何況覩枯槁凜凜  
夜不寐憂勤怒如擣亟圖濬治功拯濟須及早會當復故業  
咸令樂懷保

南巡詩序

朕念切民依咨詢幽隱於二十八年春再舉南巡爰自畿甸  
東臨齊魯沿沂江淮達於吳越曩者甲子之歲輿衛所經瞻  
顧閭閻觀省謠俗憫懷澤國軫恤羣黎未嘗一日忘於朕心

已嘗形諸篇詠載前集中今茲重歷郡邑見民物漸殷生業  
就理遠勝曩時中心慰悅又不禁吟咏及之途中停警撤蹕  
欲以洞悉輿情數千里間百姓歡躍載路星攢雲集瞻依愛  
戴發於至誠朕自淮化理何以克洽民情益用是欲然也乃  
於巡歷所至沛膏澤飭官方戒民俗修典禮經武備覽河防  
施諸事矣又發諸言或御帳殿或撫船牕吟咏所及性情在  
焉古人云詩言志凡朕篇章所寓時以民生風化惓惓爲念  
卽間於眺覽之際抒寫景物指顧山河要其寄託則自有在  
也因哀而集之爲南巡詩一卷云

南巡詩二

再過淮南 并序

嚮者巡省江左道出淮南軫念窮簷憫懷澤國今見居民景  
象較前稍豐良慰朕懷

前來歷茲境斯民似未遂今日再經過風土覺有異紈褐旣  
充體廬舍各完置擁道歡趨迎扶老與攜穉咸云獲休息近  
免徭役累水患日就平田疇可耕植一飲與一食莫不歌帝  
賜素念切民依時爲勞寤寐大造本無私湛恩欲廣被聞言  
聊自寬庶慰省方意

淮城曉霜聞雁

天際晨光水月連帶霜歸雁向前川孟城曉發寒仍在談笑  
春風雜紫烟

蜀江南逋賦 并序



江南屢年逋賦二百二十餘萬逐歲帶征聞吏民頗以爲累  
朕志存約己弘澣衣菲食之風事期裕民師挹彼注茲之義  
特頒詔令悉與蠲除

國家財賦東南重已責蠲租志念殷膏澤何妨頻見渥普天  
願與樂耕耘

過維揚 并序

南巡以來減撤儀衛所歷郡邑垂髻戴白聽其趨蹌馬首有  
以管籥迎者輒禁止之頃過維揚商民比屋連艘充盈可喜  
但結綵張燈闔溢巷陌雖邗溝爲東南孔道歡迎亦兆庶至  
情猶恐前途相效勅地方長吏諭以省費惜財并賦此詩  
重過邗溝地春風細草生帆檣連賈舶笙吹滿江城物力須  
教惜民情亦見誠繁華當淑景氣象喜充盈

金山江天寺

獨愛江天寺停橈上碧峰波瀾聲浩浩樓閣勢重重日暖浮  
雙樹風微送午鐘遙看南北岸春色澹春容

焦山

焦山何岸粵遙與金山峙草木盡蒙茸幽偏隔城市放舟下  
中流攀蘿上涯涘隱士不可招鶴銘洵足紀棲鵲驚人飛暮  
雲千萬里

駐蹕金山

烟霧空濛水國昏夜移鳳舸泊山門然犀欲照鼉鼉窟臥聽  
濤聲自吐吞

雨過錫山

輕雲冉冉霧彎環  
細雨絲絲羃遠山  
畫舫青簾開曉坐  
平波漫衍白鷗閒

虎邱望山後

試劍空存石生公  
尚有臺愛看山後  
景錯落野田開

鄧尉山

鄧尉知名久看梅  
及早春豈因耽勝賞  
本是重時巡野靄朝  
來散山容雨後新  
繽紛開萬樹相對愜佳辰

鄧尉小軒望太湖

山軒閒坐倚前楹  
萬頃澄湖夕照明  
夜久天心初月上  
笙簧謾謾奏松聲

登靈巖

霏微靈雨散春烟  
按轡逍遙陟翠巔  
香水通流明若箭  
琴臺列石勢如拳  
諸峰盡在青蘿外  
萬井全依綵仗前  
聞是吳宮花草地  
空餘鐘磬梵王筵

晚過吳江

垂虹蜿蜒跨長波  
畫戟牙樯薄暮過  
燈火千家明似晝  
好風好雨祝時和

入平望

并序

平望爲浙江界長吏以畫舫五百來迎恐勞民力卻之不御  
錦纜無勞列綵艫輕橈自愛倚船牕勤民不憚周行遠早又  
觀風向浙江

江南通志 卷之二 詩  
將遊華山以欲雨未往

欲向青山澗壑行春雲又變曉陰輕勾陳不遣驚禪定恐礙  
林間碧草生

雨中幸錫山園林

澹冶青山色幽探傍曉來烟籠巖下竹雨洗石邊苔斷續聽  
啼鳥飄搖惜落梅胸襟原浩蕩隨意坐亭臺

惠泉

寒雲覆樹昔年經甲子觀惠泉在十月再品山泉到此亭春水一犁農  
事足喜看膏雨徧郊坰

無錫小民以羔羊惠酒爭獻御舟笑而遣之

自昔君門隔九閭如何草野得攀援多因愛此元元切忘分

公然學負暄

句容雨望

山行逐高低四望多松樹雨裏萬人家遙看隔雲霧

巡幸江寧

南省封疆惟此區江流環繞壯規模華旗芝蓋重臨幸二水  
三山半畫圖吏事莫先田野治民情但願閭閻孚不知比歲  
恩波洽止聽黃童白叟呼

賜江寧文武將士宴於教場

瑞雲捧日曉初晴麗景天開羽仗明扈蹕赴桓多絳灌分行  
俊譽盡瓊珩三漿滿浥沾須徧五載南巡澤再傾自甲子南  
巡今已五  
載文穆武恬慙化理萬方無事宴昇平

再過明故宮

樓臺金粉已沉銷不獨詩人說六朝月落宮垣春寂寂經過  
惟歎草蕭蕭

江寧駐蹕 并序

江寧士民羣詣行在爭獻米穀兼羅果蔬涕泣請留屢諭不  
止俯徇億兆之願勉遲信宿之行  
心勤民隱獨諮諏不爲江山作勝遊白下回鑾期已近黔黎  
擁道欲何求多憐野老堆盤獻勉就輿情兩日留二十八年  
宵旰意豈圖遠邇慕懷柔

後湖

淼淼長湖水春來發綠波飛鳴下鳧雁朝暮集漁蓑

登報恩寺浮圖

湧地千尋起摩霄九級懸琉璃垂法相翡翠結香烟締造人  
功巧流傳世代遷曠然彌遠望萬象拱諸天

上巳日再登金山

晴和逢上巳况在大江濱正是回鑾日揮毫記此辰

長江夜月

萬頃淪漣映平沙一望收天光起水色雲影共波流隔岸姑  
蘇遠臨軒夜月浮民情咸自得何必泛龍舟

曉發維揚順風揚帆午餘已過秦郵

傍曉發蕪城風帆疾如駛晚照半平湖舟行百餘里

自宿遷解纜一日夜達山東境

千里南程幾日回輕舟直下泝滌河天風更假帆檣便一夕  
山東境上來

南巡詩序

朕三度南巡咸因視河親爲籌畫遂至江浙察吏安民所歷  
之地隨其時宜廣沛膏澤拯疾苦焉茲行兼奉

皇太后鑾輿而南旣可無闕定省之儀且欲見

先帝開基富有四海而朕守成教育率土清寧無慚付託以博  
慈顏之懌悅然往返過迅絕無滯留百司章奏三日一送行在  
卽與剖决舟行多暇仍覽書史日操觚翰偶寄吟篇莫非記  
採風俗時存懷保競業之意後之人讀朕前後南巡諸詩知  
朕心之有在云爾

南巡詩三

入江南境

行盡克東程乍入江南路水潦切痾瘵深心察其故  
經邳徐界上

泗水通淮澤坡陀認馬陵經過懷十載戶口幾新增  
雨

雲氣未肯開綿密清明雨繫纜古河湄爲念夫徒苦

閱河

淮黃疏濬費經營跋涉三來不憚行幾處隄防親指畫佇期  
耕稼樂功成

渡揚子江

曉霧風初豁揚帆縱綵舟危峰真屹立漩水急洄流碧轉沿  
江柳沙平遠嶼洲十年巡再至騁目睇神印

金山寺月夜

江山春物已雍和萬里晴光月倍多重倚高樓觀海闊浩然  
心境更如何

巡歷江南示意

財賦稱茲地時巡復此經春膏宜豆麥烟景徧林亭靡麗風  
應換敦龐訓屢形施恩頻已責聊爾翠華停

虎邱

隨風畫檝到山塘水市陰籠草木香石不點頭誰說法惟存  
澗響雜笙簧

示江南浙江守土諸臣

宇宙方清寧吏治尚端廉農使樂耕鑿民使適里閭大寮總  
其要小吏毋苛纖紀綱不可弛隨時酌寬嚴爲上能自愛羣  
屬必畏鉗訟惟善得情操守時警砭勿恃才妄作勿以媚自  
快務令比戶豐膏澤遠近霑朱幡與彤騶萬姓所具瞻臧否  
道有碑防口難可箝不見廣厦材聳榦從幽潛不見沖霄鶴  
飲啄本靜恬告誡示勉勗保護茲庶黔

花山

警蹕來初地青山鳥道深風生松澗合雲暗石苔侵靜晝飛  
閒蝶餘春噪晚禽空畱支遁跡物外託宸襟

支硎山

龍池東北古支硎石室寒泉句可聽支遁詩云石室可蔽身寒泉濯溫手想得

雨餘懸瀑布飛流界破數峰青

回鑾復過惠山

是誰妙筆點巒容蘊藉迎人四五峰堪挹山泉烹雀蕊併添新黛入甌濃

舟行野望

惠風萬頃下芳畦遠水拖烟曉狀迷河上草新纔覆地林間花墮半沾泥翩翩弱燕穿船入宛轉芳鶯隔樹啼若問撫闌端坐意默思豐裕洽羣黎

駐蹕江寧偶述

雲覆輕陰雨淨塵南巡又隔十經春山河舊數陪京重士庶今看沐化淳古巷烏衣人已換芳洲白鷺跡成陳元元億萬咸安樂教養休和屬大鈞

修報恩寺塏初畢登之

塏勢搖晨旭憑陵上九霄琉璃莊淨域金碧起香寮地俯三山近江環匹練遙隔窓雲霧起戶戶瑞烟飄

過明太祖陵有感

拔起英雄草昧間煌煌大業豈能刪玉魚金盃雖如故烟霧低迷獨愴顏

月夜登燕子磯

石勢疑飛動江濤足下看天空皎月風定斂奔湍綠樹燈光亂蒼厓夏夜寒經過觀形勝往往駐鳴鑾

江行

風帆來往亂江流樓櫓縱橫拍浪浮只在船工持柁穩曾將  
為政喻操舟

金山雨望

烟樹重重兩岸間流雲著水水漫漫江烟江樹無窮盡不讓  
蓬瀛島上山

山中晚霽

返照開澄景餘霞作綺流夜深明月出隔岸見蘆洲

中冷泉

靜飲中冷水清寒味日新頓令超象外爽豁有天真

望焦山念己巳曾登其上

大江日夜波汪洋金山焦山兩相望金山樓閣蕩丹碧焦山  
竹樹多鬱蒼境深流廣人罕至往年曾一登其岡頃者放舟  
仍北渡壯哉滉漾雲低昂青巖翠壁幽且舊圖經名著傳焦  
光何時瘞鶴在山足遺銘剝蝕存華陽山下有瘞鶴銘為華陽真逸撰止存六十  
餘葭洲白鳥忽飛出江花冥冥江草芳是日雨餘氣清淑夏  
首晴晝欣舒長倚艦四顧暢襟抱好風豁達來天閭

念淮揚居民特留漕糧二十萬以濟之回鑾之日復諄諭所  
司使布實惠

廣廈豈不樂何事駕飛艦意惟悉民隱遑問歷道途淮揚皆  
巨郡地本號饒腴居人百萬家土狹濱眾湖禾麥苟不登老  
幼日待哺恩意宜渥沛拯濟留天儲實惠布州邑遠邇均有



無諄諭嚴再三毋徒飽吏胥茅屋有起色比戶充黍稷願茲瘠壤農皞皞躋唐虞

泛洪澤湖偶詠

積水空明浸太虛輕舸閒泛進徐徐菰蘆絕岸柴門小終歲生涯業捕魚

渡河北歸

三吳問俗罷旋蹕渡洪流微日籠華蓋輕颺送御舟水能安汎濫堤遺護田疇自此民休息紆予南顧憂

宿遷

行過江南水與山柳舒花放鳥緡蠻明朝重至邳徐路鳳闕龍樓計日還

賜總河靳輔

防河紆旰食六御出深宮緩轡求民隱臨流歎俗窮何年樂稼穡此日是疏通已著勤勞意安瀾早奏功

高旻寺碑記

茱萸灣者乃維揚俗稱寶塔灣也居三岔河之中南眺金焦諸峰北枕蜀岡之麓足爲淮南勝地凡上江由儀真下江由瓜步至此皆會歸運河而北上也朕比歲以來躬臨河干諮詢經畫者屢矣每抵一處未嘗不懷保編氓施惠工商故兩淮鹽課永減額徵停輸羸羨又聞往來迎送費用私派者甚鉅特頒嚴旨盡爲禁止從此商民得以安席漸皆獲所則朕之巡幸者少有益乎朕三十八年奉

皇太后鑾輿偕行晨昏侍養視河旣畢勉從輿請濟江而南周覽吳會民生風俗見茱萸灣塔歲久寢圯朕欲頒內帑略加修葺爲

皇太后祝釐而衆商以被澤優渥不待期會踴躍赴功庀材協力唯恐或後不日告竣舊刹式廓鼎新莊嚴弘敞兼以翬飛傑閣憑高四眺臨大江通南北因書額賜之曰高旻寺勒文於石垂示久遠惟是雨暘應時河海清晏舉一世共臻于仁壽之域斯四十餘年宵旰勤民之念所厚期也卽此塔工蕝事具見羣情愛戴之誼出於至誠是亦有不可泯者爰爲書之以志始末云康熙四十三年秋九月重陽日書

操舟說

器之利用而致遠者陸行莫如車水行莫如舟舟之爲用也逸於車而險或過之若享其逸而不入於險則恃乎操舟者之有其道也當夫水石擊撞波濤怒飛迴颿如鶩驟合若離此非其巧之爲乎至於浮滄溟駕虞淵歷艤艫如衽席泛浩瀚以洄沿此非其習之然乎若或凌萬頃之中流驚颶風之四集檣檝傾徒侶失色巧者不及施習者不及試斯時也惴惴然有胥溺之憂自非備之以至豫而持之以至慎始鮮克濟事焉蓋其所爲巧與習者藝也而其所爲豫且慎者道也易曰濡有衣袽終日戒詩曰緋纒維之言其豫也言其慎也朕南巡江淮間見操舟者苟備之豫而持之慎矣雖大舟罔弗如其意之所欲爲焉苟備之不豫而持之不慎舟雖小

亦不能勝任而愉快也夫舟一器操舟一藝耳猶必有道持之以不至於敗况居天下之大器者哉揚子有言乘國者其如乘航乎航安則民安矣此物此志也

### 河臣箴

自古水患惟河爲大治之有方民乃無害禹疏而九平成攸賴降及漢唐決復未艾漸徙而南宋元滋溢今河昔河議不可一昔止河防今兼漕法旣弭其患復資其力矧此一方耕鑿失職澤國波臣恫瘝已極肩茲鉅任曷容怠佚毋俾金隄潰於蟻穴毋使田廬淪爲蛟窟毋徒糜國帑而勢難終日毋虛勞畚築而功鮮覈實務圖先事盡利導策莫悔後時節補苴術勿卽私而背公勿辭勞而就逸惟潔清以自持兼集思而廣益則患無不除績可光冊示我河臣敬哉以勗

### 漕臣箴

國家定鼎會極幽冀歲漕東南積待惟備舳艫銜尾數百萬計轉輸有程貴以時至專設重臣式董厥事我徒我旅亦云孔勤尚其寬恤厚彼糗糧尚其撫綏摩彼疴痒毋借空名耗閭左藏毋踵陋習損經制常爾克持廉則吏罔弗臧吏克守法則軍罔弗康軍旣樂康競輓以將孰困而逋孰盜其糧官苟剝之用飽已囊下復效之鼠雀曷防濡滯河干如稻集惶總計而論蝕我太倉國儲民食毋乃兩傷爾膺斯任莫忝王章

### 提鎮箴

武臣之職建威銷萌星羅棊布以壯干城韜鈴宜裕紀律宜明拊循宜至訓練宜精計安黎庶爰設五兵易言畜衆詩詠求寧閭閻叅伍勿擾吾氓山無伏莽海絕長鯨民恬耕鑿惟爾之能饋餉時給毋致呼庚爾能廉潔衆以飽騰投醪飲河古史所稱惠逮卒伍忠愛乃生如捍頭目如衛父兄羣心從違視爾攸行文武輯睦毋相抗衡軍民調劑務持其平朕親簡閱黜陟有程下逮偏裨選授匪輕才勇必錄窳惰必懲矧爾大帥節鉞是膺宜體朕意勉竭股肱

江南通志首卷 二之二

江南通志

首卷 三之一

世宗憲皇帝詔諭

康熙六十一年十一月

奉

天承運

皇帝詔曰惟我國家受

天綏祐

太祖

太宗肇造區夏

世祖章皇帝統一疆隅我

皇考大行皇帝臨御六十一年德茂功高文經武緯海宇寧謐  
曆數悠長不謂謝棄臣民遽升

龍馭親授神器屬於藐躬朕

皇考大行皇帝

德妃之子昔皇二子弱齡建立深爲

聖慈鍾愛寢處時依恩勤倍篤不幸中年神志昏憤病類風狂  
皇考念

宗社重任付託爲艱不得已再行廢斥待至十有餘年沉疾如  
故痊可無期是以

皇考升遐之日

詔朕纘承大統朕之昆弟子姪甚多惟思一體相關敦睦罔替  
共享昇平之福永圖磐石之安孔子曰三年無改於父之道  
我

皇考臨御以來良法美政萬世昭垂朕當永遵成憲不敢少有  
更張何止三年無改至於

皇考知人善任至明至當內外諸大臣朕方亟資翊贊以期終  
始保全務宜竭盡公忠恪守廉節俾朕得以加恩故舊克成  
孝思倘或不守官箴自干國紀旣負

皇考簡拔委任之恩又負朕篤愛大臣之誼部院屬吏直省有  
司亦宜實心任事潔己奉公不得推諉上官自曠厥職天下  
百姓受

皇考恩澤日久蠲賑頻施勸懲備至間有愚氓甘犯律令

皇考每遇讞決必加詳審爰書累牘披閱靡遺少有可生之路立施法外之仁凡我百姓各宜孝親敬長畏罪懷刑以副朕仰法

皇考如天好生之意茲因諸王貝勒大臣文武官員人等僉謂天位不可久虛

宗社允宜早主再三陳請朕勉徇輿情暫抑悲痛於是月二十日祇告

天地

宗廟

社稷卽皇帝位以明年爲雍正元年仰惟先志之宜承深望

皇圖之永固適昭新化期衍舊恩於戲追慕

前徽繼述無忘於夙夜廣推

聖澤恩膏願被於寰區凡爾親賢文武其共矢蓋誠各輸心膂用紹無疆之業永垂有道之庥布告天下咸使聞知

雍正元年三月二十五日江蘇巡撫奏請寬免蘆課等項銀兩奉

上諭江蘇等屬民欠地丁等項銀一百三十一萬餘兩內蘆課等項銀九萬八百兩零雖非恩詔內應行豁免之項但此事歷年最久倘行催徵窮民必致受累著一併豁免

雍正元年七月二十八日戶部以蠲免項內蘇太屬下衛所舊欠屯折等項錢糧請

旨奉

上諭未完屯折銀二萬四百九十餘兩內存留俸工銀一千二百九十餘兩雖不應豁免但此事歷年已久該撫既稱實係拖欠在軍著一併豁免

雍正元年八月十二日

諭兩江總督查弼納江南提督高其位署江蘇巡撫何天培浙江巡撫李馥太湖三萬六千頃連跨數郡地勢既廣支流復多爲盜賊出沒之所平時旣易藏奸巡捕又難著力故蘇常盜案多於他省良善被擾官吏處分皆因太湖爲之巢穴也爾等均有統轄之責可公同確議遴選賢員清查嚴緝俾匪類就擒餘黨解散日後作何稽察防範之法不使宵小復萌地方長享寧靜之福以副朕禁盜安民之意

雍正元年九月十六日戶部將江蘇所屬蘇太等衛舊欠項下不應蠲免銀兩請

旨奉

上諭此民屯地丁等銀三百五萬九千餘兩內地地租等項銀六千八百七十餘兩雖不應豁免但此事歷年已久實欠在民著一併豁免

雍正元年十月二十六日

諭戶部朕自御極以來宵衣旰食無日不以民依爲念督撫以下守令以上凡有地方之責者均宜公忠體國仰副朕心今年夏月朕以北省二麥歉收差員到南省於秋成後採買米

石以備賑貸平糶朕意切於爲民正欲酌盈劑虛以羨補不足也又恐有不便於民之處於差員臨行之時再三申諭地方米多方可採買不必定要買足今聞各省地方官因欽差買米禁止商販不許出境大負朕痼瘼一體之意甚屬不合况浙江及江南蘇松等府地窄人稠卽豐收之年亦皆仰食於湖廣江西等處今秋成歉收若商販不通必致米價騰貴該部速卽行文各省總督巡撫凡有米商出境任便放行使湖廣江西安慶等處米船直到蘇州蘇州米船直到浙江毋得阻撓庶幾有無流通民皆足食以副朕愛養元元之意

雍正二年四月初九日

諭江南總督查弼納漕運總督張大有署理江蘇巡撫何天培朕惟漕運所經河道固以通國廩之輓輸亦以便商民之利涉旗丁與商民自應一視同仁無容偏護而偏累也去年因秋冬雨少河流淤淺而旗丁人等不顧漕運維艱任意攬載客貨致船重難行聞今春丹陽常州等處地方及沿途遇淺槩拏商船起剝且借名需索貪暴公行得賄者雖空船亦行釋放不遂其欲者勒令當差有將貨物行李拋棄河干紛紛露積或爲風雨所損傷或爲盜賊所窺伺該管漕運文武官弁漫無約束毫不經心小民營販資生何以堪此擾害爾等係地方大吏皆當實心體恤稽察周詳奉諭之後或再有起剝之事當各嚴飭所屬官弁申明約束不得仍蹈前轍並出示遍諭軍民人等使知朕一體軫恤之至意至張大有身任



江南通志 卷五  
五  
總漕糧艘往來乃其專責尤宜整肅綱紀釐奸去弊嚴明馭  
下毋使玩法犯科乃往往固執己見袒護下屬任其沿河盜  
賣漕糧兼倚勢藐法貽累地方甚屬不合今除已往不深究  
外嗣後若仍不加意約束屬員有心縱容及失於覺察再經  
朕訪聞定行嚴加議處其欽承毋忽

雍正二年六月初七日戶部奏江寧安徽福建陝西四  
省未完民欠與

恩詔年久應免之條相符者候

旨豁免奉

上諭此事部議自康熙十八年至四十五年止舊欠銀米等項  
豁免著將五十年以前舊欠銀米等項俱察明豁免議奏

雍正二年八月二十四日

諭戶部前因江浙督撫等摺奏七月十八十九等日驟雨大風  
海潮泛溢衝決堤岸沿海州縣近海村莊居民田廬多被漂  
沒朕卽密諭速行具本奏聞賑卹但思被災小民望賑孔迫  
若待奏請方行賑卹致時日耽延災民不能卽沾實惠朕心  
深爲憫惻著該督撫委遣大員踏勘被災小民卽動倉庫錢  
糧速行賑濟務使災黎不致失所其應免錢糧田畝卽詳細  
察明請蠲凡海潮未至之村莊不得混行濫冒至於緊要堤  
岸衝決之處務須速行修築無使鹹水流入田畝朕念切痼  
瘼務令早沾實惠該地方官各宜實心奉行加意撫綏俾凋  
瘵得蘇生全速遂以副朕勤恤民隱至意爾部卽行文各該

督撫遵奉速行

雍正二年九月二十一日

諭江南浙江總督巡撫等今歲七月中颶風海潮泛溢江南浙江沿海州縣衛所堤岸多被衝塌居民田廬漂沒朕軫念深切已降諭旨令江浙地方官亟行賑濟撫綏毋使災黎失所今被衝海塘若不及時修築恐鹹水灌入內河有礙耕種爾督撫等著卽查明各處損壞塘工料估價值動正項錢糧作速興工至沿海失業居民度日艱難藉此傭役俾日得工價以資餬口是拯救窮民之法卽寓其中矣將此再行飭諭務期實心遵旨速行以副朕憂恤元元至意倘有不肖地方官扣尅工銀及怠緩不力者該督撫嚴查卽行題叅從重治罪

雍正二年九月二十一日河道總督齊蘇勒副總督嵇

曾筠各奏報黃淮秋汛情形奉

上諭據奏黃淮二水經過秋汛工程平穩知道了齊蘇勒自補授總河以來實心効力與嵇曾筠各率屬員將各處堤工搶修保固雖河水泛漲堤工俱各無虞甚屬可嘉齊蘇勒著給與世襲拜他喇布勒哈番嵇曾筠著加三級齊蘇勒會同嵇曾筠將河工實在効力行走勤勞顯著之員察明造冊送部議叙

雍正二年九月二十二日

諭湖廣總督楊宗仁江西巡撫裴率度河南巡撫田文鏡山東巡撫陳世倌安徽巡撫李成龍今歲各省秋成大有惟浙江

江南沿海地方七月十八九等日海潮泛溢近海田禾不無損壞朕軫念災黎惟恐失所業經嚴飭各省督撫發倉賑濟多方撫卹但蘇松杭嘉等府人稠地狹向來出米無多雖豐年亦仰給於湖廣江西及就近鄰省今沿海被災恐將來米價騰貴小民艱食湖廣江西地居上流河南山東二省接壤江南今歲俱各豐收安徽寧太等府屬亦俱收成豐稔著動湖廣司庫銀買米十萬石江西司庫銀買米六萬石運交浙江巡撫平糶動河南司庫銀買米四萬石山東司庫銀買米六萬石安慶司庫銀買米五萬石運交蘇州巡撫平糶俱著速卽辦理選委廉幹賢員陸續運送平糶銀兩仍移還補庫其米應於何地交卸湖廣江西督撫卽咨會浙江巡撫河南

山東安徽巡撫卽咨會蘇州巡撫酌議速行務於蘇松杭嘉四府民人有益毋得怠緩遲誤

雍正二年十月初四日禮部議覆條奏江海等神應加封字號遣官致祭奉

上諭致祭禮儀宜極加虔敬其應封字號著敬慎選擬仍行文直隸山東江南浙江福建廣東督撫每省各查一江海大神廟將修理之處具奏

雍正二年十月二十日兩淮巡鹽御史奏報海潮衝決奉

上諭據奏七月內海潮衝決范隄沿海二十九場溺死竈丁男婦四萬九千餘名口鹽地草蕩盡被漂沒朕心憫惻如同執

熱著卽動鹽課銀三萬兩委員分路賑恤務使得所不必該御史捐補其未完折價錢糧四萬餘兩悉行蠲免毋得仍稱帶徵名色致累現在窮丁該部遵旨速行至淮商運行鹽觔恐竈丁一時未能煎辦應作何接濟民食該部作速確議具奏

雍正二年十月二十五日

諭江浙兩省督撫提鎮江浙兩省沿海地方於七月十八十九兩日皆被潮水漂沒居民廬舍雖經頒旨加意賑恤然朕憫惻之念至今尚未能釋惟有朝夕警惕以答

天意但海爲衆水所歸無不容納今乃狂潮泛溢水不循軌或者海洋潛藏匪類亦未可定稽諸前事往往有之沿海各省督撫提鎮務須實心愛養小民整理營伍俾閭閻各安其業汛防有備無虞毋令海洋別生事端庶不負朕委任之意

雍正二年十二月初四日

諭吏部尚書朱軾浙江沿海塘工最爲緊要署巡撫石文焯前奏必須通用石塊修築後又奏稱不必用石全無定見誠恐貽悞塘工朕已諭令法海佟吉圖作速詳議具奏矣但恐法海等初任不諳地方情形爾曾爲浙江巡撫必知海塘緣由著馳驛前往浙江將作何修築之處會同法海佟吉圖詳查定議交與法海等修築爾卽回京朕思海塘關係民生必須一勞永逸務要工程堅固不可吝惜錢糧江南海塘亦爲緊要爾浙江事竣卽至蘇州會同何天培鄂爾泰將查勘蘇松

江戶通志 卷之三十一  
塘工如何修築之處亦定議具奏

雍正三年三月十九日管理戶部事務怡親王奏請酌減蘇松浮糧奉

上諭覽管理戶部事務怡親王所奏具見勤求民隱爲國推恩之意正應戶部辦理之事蘇松之浮糧當日部臣從未陳奏常厘

皇考聖懷屢頒

諭旨本欲施恩裁減乃彼時大臣以舊額相沿已久國課所關綦重恐損上益下非理財之道數以不應裁減固執覆奏凡國家大事因革損益必君臣計議畫一始可舉行若

皇考違衆獨斷既非詢謀僉同之義且恐一時減免倘後來國用不足又開議論之端是以從衆議而中止然

聖慈軫念蘇松誕敷渥澤屢蠲舊欠以紓民力其數較他處爲多是亦與裁減正額無異也今怡親王等悉心籌畫斟酌奏請甚爲可嘉朕仰體

皇考愛民寬賦之盛心准將蘇州府正額銀蠲免三十萬兩松江府正額銀蠲免十五萬兩論語曰百姓足君孰與不足周易曰損上益下民悅無疆朕但願百姓之足時存益下之懷用是特沛恩膏著爲定例俾黎民輕其賦稅官吏易於催科可飭令該地方知之

雍正三年五月十六日奉

上諭朕軫念民生蠲租賜復不過行吾心之所安使斯民共沾

江南通志 首卷  
實惠並無一毫市恩之念欲以崇尚虛名也前蠲免江南蘇松兩府浮糧彼處士民感激朕恩爲朕祈福聞有誦經立碑蓋造龍亭聚會演戲者雖或出於愛戴之誠然實非矢報君親之理朕所望於天下者祇欲各安職業端本務實以生以養庶幾家給人足共享昇平仰報我

皇考之付託耳以云祈報莫大於此至於誦經禮懺諸事皆爲粉飾虛文卽謂頌禱致虔亦於朕躬毫無所益且聚衆演戲蓋造碑亭非徒糜費金錢兼恐有不肖官吏及里胥人等借名私派乾沒肥己貽累小民俱未可定此等陋俗

聖祖仁皇帝久已洞悉屢會降

諭旨禁止及朕臨御以來曉諭天下人民務本重農力行節儉而聚衆演戲諸事更屬奢靡浪費蘇松士民習於華侈今又爲此虛文以祈朕福甚非朕意朕實惡之著該督撫嚴行禁飭其碑亭建造之處槩行停止仍遍諭士民各歸本業以副朕懷嗣後仍有此等浮華之舉朕必嚴懲以法

雍正二年五月十七日

諭戶部去歲江浙海潮衝溢沿海海塲竈淹沒之處甚多兩淮鹽政所屬地方經噶爾泰奏聞朕卽發帑賑恤并將雍正元年二年竈戶未完折價銀四萬餘兩悉行蠲免其兩浙鹽政所屬地方該巡鹽並未將被災之處題報今謝賜履摺奏去秋海濤飄決情形兩浙與兩淮無異朕一視同仁務使率土均霑膏澤著將華亭婁縣上海海寧餘姚蕭山慈谿等縣雍正

元年二年未完場課銀兩悉行蠲免該鹽政通行曉諭俾各場丁戶人人得霑實惠將已未完場課數目確查報部倘有不肖有司將已完作欠或借端朦混私行重徵者卽指名題叅若通同隱匿後經察出將該鹽政一併從重治罪該地方督撫仍嚴加稽察毋使吏胥中飽以副朕勤恤窮丁普濟同仁之至意爾部卽遵諭行

雍正四年正月十二日奉

上諭據兩淮巡鹽御史噶爾泰奏稱衆商感戴保育生全賑卹蠲免之恩今鹽豐課裕商業已隆情願公捐銀二十四萬兩備交運庫又伊自己名下有應得銀八萬兩亦願報部撥解等語從前兩淮鹽課虧欠甚多自噶爾泰辦理以來歷年商

欠正項贏餘俱一一完納恤商裕課鹽政肅清甚屬可嘉朕前曾降諭旨令江南督撫酌議積穀以爲備用今衆商公捐及噶爾泰奏請解部之項共計三十二萬兩著將二萬兩賞給噶爾泰其三十萬兩可卽爲江南買貯米穀蓋造倉廩之用所蓋倉廩賜名鹽義倉卽著噶爾泰交與商人經理如此則於地方積貯甚爲有益而衆商急公之項亦得實濟著議政大臣大學士九卿詳議具奏噶爾泰著該部從優議敘其急公衆商行令噶爾泰分別造冊報部亦著議敘以示鼓勵

雍正四年二月二十九日

諭江蘇巡撫朕每見蘇松漕米虧空案內一經承名下侵蝕至二三千石訪問其故知糧重倉多之處州縣官不能兼顧聞

江南通志 卷之三十一  
點派收書經管收納所收民糧除丁兌外原有斛面餘米存  
留在倉遂有糧戶將應上米石私相折銀收書將餘米劃算  
迨收折既多倉內餘米不足以補而所收米價又已隨手花  
費以致虧空漕項此不可不嚴立條禁也嗣後收書有侵蝕  
漕米者該州縣詳叅後審究確實按其米數卽照監收自盜  
律治罪爲當并將簽派收書之員題叅議處其侵蝕米石查  
明私折之糧戶著於各糧戶名下追補庶可懲滑吏而警愚  
民爾可議奏至各州縣所收倉糧丁兌之外倘有贏餘令該  
州縣報明存貯公所爲修理常平倉廩之用再有餘剩歸入  
常平倉以佐賑濟該撫嚴飭蘇松二府各州縣實心奉行倘  
有借餘米名色加收斛面遺累小民者定行從重治罪決不  
少貸特諭

雍正四年十二月初十日奉

上諭今歲江南地方秋雨稍多其江安所屬被水之州縣已令  
該督撫轉飭有司確查賑恤務使小民得所但聞入冬以後  
時有陰雨積水未消春麥未能及時耕種恐交春米價漸昂  
而青黃不接之時更須預爲籌及況蘇松戶口繁多民間食  
米多取給於外販尤當早爲留意查江安糧道有存貯還漕  
一項約計二萬八千餘石安慶廬州鳳陽淮安四府各有分  
貯留漕之項共計九萬餘石此米原爲地方備用而設但恐  
年月已久未必實貯在倉應差京官一員前往確查並會同  
江南督撫作何分別留運平糶之法以濟民食但江南地廣



人稠恐需米之處此數未必敷用必設法多貯方覺寬裕其應作何採買送運備用之處著九卿速議具奏

雍正四年十二月二十一日

諭戶部江南地方今歲秋冬雨水稍多低窪之處未免減收目前米價雖平恐明歲青黃不接之時價值不免昂貴朕心軫念預爲籌畫已特遣專官將從前截留漕米一一清查會同該督撫商酌以濟地方之用又令該督撫動用正項錢糧委員於鄰省採買米穀以備積貯平糶之需朕思蘇松常鎮四府地廣人稠需米甚多而四府所屬漕兌共一百四十餘萬石居七省漕糧三分之一今州縣既有被水之區恐小民輸納匪易著將成災五分以上之地畝應出漕米緩徵一半約計將及二十萬石俾閭閻既寬正額之輸將而地方又有多餘之米粟則編戶窮黎當不慮其乏食矣其緩徵一半漕米著於雍正五年秋收後帶徵完納其不成災之地畝仍照額徵之數准其紅白兼收著將此速諭該督撫遵行

雍正五年正月二十八日奉

上諭地方水利 恭紀河渠志

雍正五年二月初六日

諭兵部水師甚屬緊要現今天津設立水師滿洲官兵操練學習其江寧駐防滿洲官兵亦應照天津水師之例設立水師令其操練鎮江水師現有船隻將此船內酌量撥給江寧將軍令其學習操練至如何操練應撥給船隻若干或船隻不

敷作何添造之處爾部一併定議具奏

雍正五年六月初二日江蘇巡撫陳時夏奏報婁江水  
利工程告竣士民請建

萬壽碑亭奉

上諭朕以實心舉行實政全不好尚虛文如士民感恩建碑之  
事屢降諭旨嚴行禁止今因江南婁江水利工程告竣士民  
具呈謝恩內有願鑄萬壽碑之語而巡撫陳時夏代爲具題  
貼黃內並未將建碑字樣叙入明係欲從民請故本章內有  
意含糊甚屬不合可速止之

雍正五年九月十二日奉

上諭朕因直隸湖廣州縣數處近江臨河平時易於被水者今  
歲又經澇溢故降特旨將錢糧全行蠲免此乃軫念水鄉之  
民施恩格外而他處聞知遂生冀倖之意如固原地方六月  
偶遇冰雹而鍾保遂張大其事捏詞具奏續據路振揚摺奏  
前來始知暫時驟雨帶有冰雹夏苗並未傷損秋禾發生茂  
盛今覽鍾保本章亦自稱勘不成災似此虛假衆所共見朕  
因人情如此是以聞江南浙江近水之地亦有數處被水未  
曾加以格外之恩然軫念窮民朕懷殷切著江南總督范時  
繹動用庫銀二萬兩於上下兩江應用之處散賑著浙江巡  
撫李衛動用庫銀一萬兩於應用之處散賑務選賢員辦理  
令窮民均沾實惠儻有餘剩銀兩著該督撫奏聞

雍正五年九月十六日雲貴總督鄂爾泰條奏江南三

江南通志 首卷  
三  
江水利事宜奉

上諭覽鄂爾泰所奏江南水道事宜甚屬周詳但摺內有越職陳奏字樣凡內外大臣越職辦事固為不可至若有關於國計民生者雖非己身職任之事既有見聞卽當據實入告方合公忠體國之義此乃盡職非越職也如孔毓珣經過鳳陽地方卽以水利情形奏聞朕甚嘉之鄂爾泰所奏著發與范時繹陳時夏齊蘇勒陳世倌鄂禮就近詳加相度悉心妥議具奏

雍正五年十一月初十日奉

上諭自古治水之法惟在順其自然之勢而利導之蓋水之爲害者大抵由於故道湮塞使水不得徑直暢流以致泛溢而爲患但恐徑直之路湮塞年久或民間既已蓋造室廬開墾田畝或且安塋墳墓人情各顧其私不知遠大之計今見欲於此地開濬河道則因循規避百計阻撓而司其事者未免惑於浮議遂致遷就紆回別開溝洫苟且從事而不能成一勞永逸之舉此治水之通弊也昨岳鍾琪奏稱陝西現在興修漢渠以濟民田亦以開濬之處不無礙於墳墓故爾遲回朕諭之曰果係民間墳墓所在當給與買地之價令其遷葬民自樂從岳鍾琪云若果給與遷葬之費則公私均便小民無不樂從者朕已諭岳鍾琪在陝遵行目今江南地方現在興修水利著該撫與欽差官員亦照此辦理若水勢必由之路有礙墳墓卽於興修水利錢糧內動支銀兩給與本人令

其改葬俾小民既有營葬之資而河工亦收利導之益則水患可除水利可興地方永遠蒙福矣

雍正五年十二月十八日奉

上諭吳淞石塘當日勘估之時於海潮紆緩之處酌量修築土塘蓋因工程浩大諸臣勘估爲節省錢糧起見故如此定議但東南財賦之區灌溉田畝保聚室廬全賴海塘捍衛朕思海勢衝激風濤旋轉難定土塘經歷年久未免可虞不若一例盡修石塘爲百姓萬年之利似爲一勞永逸朕詢問齊蘇勒亦云甚當著陳時夏陳世倌鄂禮等將現在土塘改築石塘之處確行勘估詳悉定議具奏不得惜費省工苟且塞責務須堅固永垂久遠以副朕經理海疆愛養民命之至意

雍正五年十二月二十日兩江總督范時繹奏報估計

修濬太倉州河道工料銀兩奉

上諭據范時繹奏稱太倉州鎮洋縣士民僉稱境內劉河鉅工已蒙發帑開濬而七浦一河原係民田沾獲其利今情願照依舊例業戶給食佃戶出力不敢再費帑金等語朕思君民原屬一體民間之生計卽國計也倘遇國用不敷之時勢不得不資藉於民力今國家財用充足朕爲地方籌畫萬年之利不惜多費帑金興修鉅工養育萬姓若仍用民力以辦公事非朕本心也况小民効力工程或致荒其本業而又不免官吏之督催煩擾朕心實爲不忍昨蘇州一二有力之紳士懇請捐資以助地方之公事與此不同朕是以降旨准行著

將范時繹所奏士民捐助之處停止仍動用公帑辦理並將朕旨通行曉諭該州縣士民伊等當體朕愛養元元之心於工程告成之後加意照看歲歲疏濬防護俾地方永受其益則勝於目前之趨事赴功多矣

雍正五年十二月二十八日奉

上諭朕因蘇松等處地方水利功程關係民生最爲緊要特遣官員會同巡撫等悉心經理務期修築開濬以惠蒸黎凡工用所需悉發庫帑絲毫不以煩勞民力諭旨頒布至再至三昨范時繹奏稱太倉鎮洋士民僉云劉河鉅工已費國帑其七浦一河工程民間情願出力以助修濬不敢再動帑金等語朕又復降旨嚴行禁止此中外所共知者頃聞長洲元和

等縣有按照田畝科派銀兩之事朕思工費悉用帑金原以杜科派田畝之弊昨太倉等處士民懇請出力助工朕且嚴行禁止豈容不肖官吏按畝派費累及小民或者夫役等得受官價之外有田之業主幫貼飯食而不知者遂誤認以爲按畝派費亦未可定或者衙門之蠹役本地之攬頭借幫貼飯食之名派雜費以飽私囊亦未可定著范時繹陳時夏等通行曉諭令良善之民勿爲奸猾所欺並時時訪察稽查除田主幫貼飯食外倘有胥吏攬頭等巧借名色科派分文者立即提拏重治其罪並將辦理工程之官員指名題叅從重議處倘官吏人等本無派費累民之處而本地居民或以工程礙伊室廬田土不願興修故捏造浮言以惑衆聽或奸民

欲行包攬不遂其私故傳播此語以阻撓公事則情罪甚屬可惡著范時繹陳時夏等確實查拏從重治罪

雍正六年二月十一日奉

上諭兩淮商人感戴朕恩急公念切數年以來將正項及帶銷銀兩俱照數全完又捐銀數十萬兩辦理地方公事甚屬可嘉今因揚州修濬水利工程又請公捐銀三十萬兩以佐公費朕聞之心甚不忍此衆商効力之處或係伊等力量寬舒實心踴躍合力捐輸以報國恩而襄公事或係地方大臣官員等授意商人而有此舉著詢問衆商令其務將真情據實呈明該督再行具奏請旨

江南通志首卷 三之一

